



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-1828/03.

Sarajevo, 29. decembra 2003.

Z A P I S N I K

27. sjednice Predstavničkog doma Parlamentarne skupštine Bosne i Hercegovine,
održane 29. decembra 2003. godine

Dvadesetsedma sjednica počela je u 10,15 sati. Prisustvovalo je 39 poslanika. Odsustvo je opravdao Elmir Jahić. Zoran Spasojević i Nijaz Duraković nisu javili razlog izostanka.

Iz Vijeća ministara sjednici su prisustvovali ministri Mladen Ivanić, Dragan Doko i Branko Dokić, te zamjenici ministara Ivica Marinović i Zoran Tešanović.

Predsjedavajući Doma Nikola Špirić podsjetio je poslanike da 23. decembra nije održana sjednica Doma, koja je bila sazvana zbog usvajanja izvještaja Zajedničke komisije za usaglašavanje istovjetnog teksta Zakona o sistemu indirektnog oporezivanja, zato što Komisija nije završila posao na usaglašavanju. Zbog toga će se Izvještaj Komisije uvrstiti u dnevni red ove sjednice, pored tačke o aktuelnom ekonomsko-socijalnom stanju u Bosni i Hercegovini, s posebnim osvrtom na zaštitu domaće proizvodnje.

Prije rasprave o prijedlogu dnevnog reda, Nikola Špirić predložio je da Dom usvoji radni zaključak kojim će se pozvati Vijeće ministara da, u skladu s raspoloživim finansijskim i materijalnim mogućnostima, uputi pomoć narodu Irana, koji je zadesila katastrofalna nesreća izazvana razornim zemljotresom.

U vezi s prijedlogom dnevnog reda, diskutirala je Azra Hadžiahmetović. Uz ostalo, kazala je da su mehanizmi zaštite domaće proizvodnje danas prevaziđena kategorija i da se više govori o stimulaciji domaće proizvodnje i ekonomskih odnosa s inozemstvom i stimuliranju izvoza. Mehanizam zaštite domaće proizvodnje podrazumijeva protekcionističke mjere koje su zabranjene od međunarodne zajednice, kazala je, uz ostalo, Azra Hadžiahmetović. Zato je predložila da se tačka dnevnog reda preformulira, tako da glasi: Aktuelno ekonomsko-socijalno stanje, s posebnim osvrtom na stimuliranje domaće proizvodnje.

Predsjedavajući Nikola Špirić konstatirao je da 27. sjednica ima sljedeći

DNEVNI RED

1. Aktuelno ekonomsko-socijalno stanje u Bosni i Hercegovini, s posebnim osvrtom na zaštitu i stimuliranje domaće proizvodnje,
2. Izvještaj Zajedničke komisije o nastojanju za postizanje sporazuma o istovjetnom tekstu Zakona o sistemu indirektnog oporezivanja.

Prije prelaska na rad po usvojenom dnevnom redu, predsjedavajući je na glasanje dao prijedlog zaključka koji je prethodno predložio.

Dom je jednoglasno usvojio radni

ZAKLJUČAK

Poziva se Vijeće ministara da, u skladu s finansijskim i materijalnim mogućnostima, uputi pomoć građanima Irana povodom katastrofalne nesreće izazvane zemljotresom.

Ad – 1: Aktuelno ekonomsko-socijalno stanje u Bosni i Hercegovini, s posebnim osvrtom na zaštitu i stimuliranje domaće proizvodnje

Predsjedavajući Špirić konstatirao je da sjednici prisustvuje ministar vanjske trgovine i ekonomskih odnosa i da bi bilo dobro da se ministar obrati Domu i obrazloži materijal koji je poslanicima dostavljen.

Prije izlaganja ministra, kraće su diskutirali Selim Bešliagić i Beriz Belkić.

Selim Bešliagić skrenuo je pažnju na materijal koji je od Vijeća ministara dostavljen povodom ove tačke dnevnog reda, a koji nosi naslov: «Strateški pravci u vođenju vanjske trgovine i podrške izvozu», te rekao da na osnovu materijala nije spreman uzeti učešće, ukoliko se ne podnese prethodno izlaganje o socijalnom stanju u Bosni i Hercegovini. Zahtjev za sazivanje sjednice prouzrokovalo je stanje izazvano uvođenjem bescarinskih odnosa sa Srbijom i Hrvatskom, rekao je, između ostalog, Selim Bešliagić.

Beriz Belkić podsjetio je na prijedlog Azre Hadžiahmetović za preformulaciju tačke dnevnog reda, o čemu se Dom nije izjasnio.

Predsjedavajući Špirić odgovorio je da je na prijedlog Azre Hadžiahmetović dopunjena formulacija tačke dnevnog reda dodavanjem riječi «i stimuliranje», i da se može govoriti i o zaštiti i o stimuliranju u okviru rasprave o ovoj problematici. Zatim je dao riječ ministru vanjske trgovine i ekonomskih odnosa.

Dragan Doko, ministar vanjske trgovine i ekonomskih odnosa u Vijeću ministara Bosne i Hercegovine, podnio je Domu izlaganje, uz istovremenu prezentaciju ekonomsko-socijalnog stanja u Bosni i Hercegovini i projekcije za budućnost.

U raspravi u okviru ove tačke učestvovali su: Zlatko Lagumdžija, Azra Hadžiahmetović, Nikola Kragulj, Momčilo Novaković, Martin Raguž, Muhamed Moranjkić, Sead Avdić, Seada Palavrić, Jozo Križanović, Fatima Leho, Hasan

Muratović, Nikola Špirić, Milorad Živković, Petar Kunić, Tihomir Gligorić i Mladen Potočnik.

Nakon rasprave, na prijedlog predsjedavajućeg, Dom je usvojio sljedeći

Z A K L J U Č A K

1. Zadužuje se Komisija Predstavničkog doma za vanjsku trgovinu i carine da, na osnovu rasprave i predloženih zaključaka, Predstavničkom domu predloži prijedlog zaključaka koji će se, nakon usvajanja, uputiti Vijeću ministara Bosne i Hercegovine.

2. Zadužuje se Vijeće ministara Bosne i Hercegovine da svoje aktivnosti zasniva na odredbama sporazuma o slobodnoj trgovini i hitno počne bilateralne aktivnosti na tom planu kako Bosna i Hercegovina ne bi trpjela bilo kakve posljedice.

Ad – 2: Izvještaj Zajedničke komisije o nastojanju za postizanje sporazuma o istovjetnom tekstu Zakona o sistemu indirektnog oporezivanja

Predsjedavajući Doma rekao je da je Zajednička komisija dostavila Izvještaj i da je postigla saglasnost o istovjetnom tekstu Zakona o sistemu indirektnog oporezivanja.

U ime Komisije, Izvještaj je obrazložio Tihomir Gligorić. Između ostalog, rekao je da je Komisija korektno radila na usaglašavanju amandmana usvojenih u Predstavničkom domu i Domu naroda i da je postignuta saglasnost o istovjetnom tekstu Zakona, ali da je bilo mnogo rasprave u vezi s regionalnim centrima, te da je Komisija usvojila zaključak, koji je sadržan u Izvještaju, kojim se obavezuje Vijeće ministara da, u roku od 6 mjeseci od dana stupanja na snagu Zakona o sistemu indirektnog oporezivanja, razmotri ekonomske pokazatelje o opravdanosti broja regionalnih cenata za indirektno oporezivanje, te da o tome izvijesti Parlamentarnu skupštinu Bosne i Hercegovine.

Poslije izlaganja Tihomira Gligorića, predsjedavajući je Izvještaj dao na glasanje.

Od 38 prisutnih, za Izvještaj je glasalo 28, protiv 7, uzdržala se 3 poslanika. Po entitetima, iz Federacije BiH za su glasala 22, iz Republike Srpske 5 poslanika.

Predsjedavajući je konstatirao da je Dom usvojio Izvještaj o postignutom sporazumu o istovjetnom tekstu Zakona o sistemu indirektnog oporezivanja u Bosni i Hercegovini.

Ovim je, u 13,35 sati, završena 27. sjednica Predstavničkog doma Parlamentarne skupštine Bosne i Hercegovine.

Sastavni dio Zapisnika je transkript sjednice.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Nikola Špirić